



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Broj :
Sarajevo,

Na osnovu člana 26. stav 1. tačka 2. i člana 74. stav 1. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), Gradsko vijeće Grada Sarajeva, na 45. sjednici održanoj dana 30.11.2020. godine, primilo je k znanju

Informaciju o aktivnostima Informativnog centra o Međunarodnom krivičnom sudu za bivšu Jugoslaviju Sarajevo u 2020. godini

PREDSJEDAVAJUĆI GRADSKOG VIJEĆA

Dr. Igor Gavrić

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba





Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNIK

Informacija

**o aktivnostima Informativnog centra o Međunarodnom krivičnom sudu
za bivšu Jugoslaviju Sarajevo u 2020. godini**

Predlagač: Gradonačelnik

Obrađivač: Gradska služba za europske
integracije i EU fondove

Sarajevo, decembar 2020. godine

Adresa: Hamdije Kreševljakovića 3
71000 Sarajevo, BiH
Tel: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



Programom rada Gradskog vijeća Grada Sarajeva za 2020. godinu u mjesecu decembru programirana je Informacija o aktivnostima Informativnog centra Međunarodnom krivičnom sudu za bivšu Jugoslaviju, te se u skladu sa navedenim podnosi se:

Informacija
o aktivnostima Informativnog centra o Međunarodnom krivičnom sudu
za bivšu Jugoslaviju Sarajevo u 2020. godini

1. UVOD

Informativni centar o Međunarodnom krivičnom sudu za bivšu Jugoslaviju Sarajevo (u daljem tekstu: Informativni centar o MKSJ Sarajevo/Informativni centar/Centar) nastao je na temelju potpisanog Memorandum o razumijevanju između Međunarodnog krivičnog suda za bivšu Jugoslaviju (MKSJ) i Grada Sarajeva za razvoj Informativnog centra Sarajevo, a Gradsko vijeće Grada Sarajeva donijelo je Odluku o davanju saglasnosti na citirani memorandum („*Službene novine Kantona Sarajevo*“, broj 50/16). Informativni centar o MKSJ Sarajevo sa sjedištem u Vijećnici zvanično je počeo sa radom 23.05.2018. godine. Mandat Informativnog centra se sastoji u tome da pruži javnosti ažuran, direktan i bezbjedan elektronski pristup svim javno dostupnim spisima Tribunala i arhivskom materijalu sadržanom u online bazama podataka MKSJ, kao i da obavlja poslove informisanja javnosti o pitanjima ratnih zločina, doprinoseći tako procesu tranzicione pravde i jačanju vladavine prava u BiH i regionu uspostavljanjem snažne outreach komponente, uključujući: komponentu tranzicione pravde – organizovanjem raznih informativnih i edukativnih javnih događaja, komponentu podrške pravnim profesionalcima i civilnom društvu koji se bave ratnim zločinima pred domaćim sudovima u BiH- kroz aktivnosti na izgradnji njihovih kapaciteta i izložbenu komponentu- prikaz rada MKSJ i sudova u BiH na donošenju presuda u predmetima ratnih zločina. Poslovi Centra (mandat) je stavljen u djelokrug Gradske službe za europske integracije i EU fondove temeljem Pravilnika o unutrašnjoj organizaciji i sistematizaciji radnih mjesta organa uprave Grada Sarajeva, broj 01/04-34-4204/19 od dana 05.06.2019. godine, a na koji je Gradsko vijeće Grada Sarajeva na 29 sjednici, održanoj 26.06.2019. godine, dalo saglasnost svojom Odlukom o davanju saglasnosti na Pravilnik o unutrašnjoj organizaciji i sistematizaciji radnih mjesta organa uprave Grada Sarajeva („*Službene novine Kantona Sarajevo*“, broj 28/19).

Informativni centar o MKSJ Sarajevo zvanično je počeo sa radom 23. maja 2018. godine. Informativni centar MKSJ otvorili su gradonačelnik Sarajeva Abdulah Skaka, sudija i bivši predsjednik MKSJ Fausto Pocar i šefica kabineta predsjednika Mehanizma, gđa Gabrielle McIntyre.

Centar je trenutno ustrojen kao unutrašnja organizaciona jedinica Grada Sarajeva i operativne poslove Centra obavljaju državni službenici-uposlenici Grada Sarajeva. Centrom upravlja gradonačelnik.

U kreiranju politika razvoja Centra pomaže mu Savjet gradonačelnika za Informativni centar koji je predviđen potpisanim Memorandumom. Savjet trenutno broji 11 članova iz reda istaknutih pojedinaca-univerzitetski profesori i javni radnici koji se bave pitanjima tranzicione pravde, ratnim zločinima i radom Tribunala.

Prema potpisanom Memorandumu sa MKSJ, mandat Centra se sastoji od pružanja javnosti ažurnog, direktnog i bezbjednog elektronskog pristupa svim javno dostupnim spisima Tribunala i arhivskom materijalu sadržanom u online bazama podataka MKSJ, kao i obavljanje poslova informisanja i edukacije javnosti o pitanjima ratnih zločina, doprinoseći time procesu tranzicione pravde i jačanju vladavine prava u BiH i regionu, uz jačanje komponenti: suočavanja sa prošlošću, podrške pravnim profesionalcima i civilnom društvu koji se bave ratnim zločinima pred domaćim sudovima u Bosni i Hercegovini i izložbene komponente-prikaza rada i djelovanja Tribunala na donošenju presuda.

Informativni centar o MKSJ Sarajevo je prvi centar ove vrste u regionu koji istovremeno razvija sve komponente svog mandata i koji je za godinu i pol dana svoga rada kapacitirao svoje resurse (prostor, tehnika) i proveo niz aktivnosti koje su imale za cilj afirmaciju svih komponenti njegovog mandata. Između ostalog, Centar je u cijelosti omogućio online pristup dostupnoj arhivskoj građi MKSJ, ugostio preko 900 domaćih i stranih studenata, istraživača i učenika, uspostavio nekoliko značajnih saradnji sa akademskom zajednicom, pravosuđem i relevantnim udruženjima, održao nekoliko međunarodnih konferencija, te omogućio da dio njegovog sadržaja bude i originalna sudnica Tribunala koja je dopremljena iz Haga i koju svakodnevno obilaze i turisti našeg grada i tako se upoznaju i sa novijom historijom naših prostora na temelju činjenica koje je utvrdio Tribunal u svojim pravosnažnim presudama.

Sjedište Centra je u najreprezentativnijem objektu u Gradu – sarajevskoj Vijećnici, suteran i trenutno Centar raspolaže sa cca 1000 m² prostora kojeg čini:

Multifunkcionalna sala: konferencijska sala sa računarima – u kojoj se vrši pretraživanje baza i u kojoj se organizuju predavanja za studente i različite radionice.

Biblioteke sa čitaonicom: bibliotekarski fond čine sve kopije dvojezičnih presuda koje je Međunarodni krivični sud za bivšu Jugoslaviju (MKSJ) izrekao za 24 godine svog rada, kao i značajan dio bibliotekarskog fonda Tribunala koji se, između ostalog, sastoji od vrijednih naslova: knjiga, stručnih publikacija, zbornika radova, anala, kao i kompletne outreach kolekcije pisanih i video materijala koje je stvarao Tribunal, a koje su u septembru 2019. godine dopremljene u Centar. Opremanje biblioteke se vršilo uz finansijsku podršku Fondacije Konrad Adenauer za jugoistočnu Evropu – Program za vladavinu prava.

Muzejski prostor (izložena autentična sudnica broj 2. Tribunala dopremljena iz Haga u maju 2018. godine), kao i stalna izložbena postavka „Prikaz rada i doprinosa Međunarodnog krivičnog suda za bivšu Jugoslaviju (MKSJ)“, a čijom realizacijom je Centar razvio muzejsku komponentu u cijelosti, te ova izložba, zajedno sa originalnom sudnicom, čini jedinstvenu izložbenu postavku. Sarajevo je ujedno i prvi grad poslije Nürnberga koji ima izloženu autentičnu sudnicu u kojoj se sudilo za počinjene ratne zločine.

Službene prostorije: kancelarijski prostor za osoblje Centra

Informativne i edukativne aktivnosti: Centar je uspostavio saradnju sa određenim brojem akademskih ustanova – Pravni fakultet Univerziteta u Sarajevu, Sarajevo School of Science and Technology-SSST (od strane uposlenika Centra organizuju se predavanja za studente 3 i 4 godine studija o međunarodnom humanitarnom pravu, osnivanju, mandatu, nasljeđu i značaju MKSJ-a), saradnju sa Memorijalnim centrom Potočari-Srebrenica, saradnju sa Sudom BiH (predavanja i obuke za korištenje baza MKSJ za potrebe rada), organizuje predavanja, međunarodne konferencije i javne događaje za širu javnost, kao npr: predavanje predsjednika Mehanizma sudija Theodora Merona, glavnog tužioca Mehanizma Sergea Brammertza, međunarodna konferencija sa tužiocima Tribunala: Kenneth Scott, Mark Harmon, sudijama i predsjednicima MKSJ Fausto Pocar, Robinson Patrick, projekti obilježavanja Dana ljudskih prava sa UN-om i Ambasdom Ujedinjenog Kraljevstva Velike Britanije, međunarodne ljetne škole, javno praćenje izricanja presuda, iniciranje uspostave međunarodnog doktorskog studija koji će koristeći bazu MKSJ vršiti naučnoistraživački rad i sl.

Saradnja sa relevantnim NVO: Centar institucionalizira saradnju sa udruženjima koja se bave tranzicijskom pravdom, postkonfliktnim društvima, udruženjima žrtava i sl.

Saradnja sa sličnim centrima i memorijalima koji njeguju memoriju: Uspostavljena je saradnja sa Memorijalnim centrom Potočari-Srebrenica, a u toku su aktivnosti na uspostavljanu saradnja sa Memorijalom u Nürnbergu, Auschwitzu i Informativnim centrom o Međunarodnom krivičnom sudu za Ruandu u Aruši (Ruanda).

Javni događaji: Uspostava i obilježavanje značajnih datuma utvrđenih međunarodnim dokumentima (Dan ljudskih prava, Dan sjećanja na žrtve holokausta. Dan sjećanja na genocid počinjen u Srebrenici) ili presudama Tribunala (5. april – Dan početka opsade Sarajeva) i organizovanje posjeta domaćih i inostranih zvaničnika. Centar je postao i značajan dio turističke ponude grada Sarajeva i objekta Vijećnice, turistički hot spot.

2. AKTIVNOSTI INFORMATIVNOG CENTRA O MEĐUNARODNOM KRIVIČNOM SUDU ZA BIVŠU JUGOSLAVIJU SARAJEVO U 2020. GODINI

2.1. Normativne aktivnosti i uspostavljene saradnje

Gradska služba za europske integracije i EU fondove unutar koje djeluje Centar obradila je sljedeće opće akte:

- Memorandum o saradnji između Grada Sarajeva i Memorijalni centar Srebrenica-Potočari Spomen obilježbe i mezarje za žrtve genocida iz 1995 godine Srebrenica, juni 2020. godine
- Memorandum o saradnji između Grada Sarajeva i Sarajevo School of Science and Technology – SSST- a, januar 2020.

- Memorandum o saradnji Grad Sarajevo i Fondacija Konrad Adenauer – Predstavništvo u BiH, januar 2020.
- Program aktivnosti za Dan obilježavanja opsade Sarajeva 1992.-1995. za 2021. godinu, septembar 2020.
- Prijedlog Odluke o davanju saglasnosti na Program aktivnosti za Dan obilježavanja opsade Sarajeva 1992.-1995. za 2021. godinu, oktobar 2020.
-

2.2. Informativne i edukativne aktivnosti

U prvom kvartalu 2020. godine Informativni centar je u skladu sa usvojenim Programom aktivnosti za Dan obilježavanja opsade Sarajeva 1992.-1995. za 2020. godinu, provodio intenzivne aktivnosti sa ciljem pripreme obilježavanja Dana opsade Sarajeva 05.04.2020. godine. Program obilježavanja se sastojao iz dvije komponente – organizacije međunarodne konferencije o opsadi Sarajeva kroz presude MKSJ-a, a učešće su potvrdili predsjednici MKSJ-a i sudije Robinson Patric Lipton i Fausto Pocar (koji su ujedno radili na predmetima ratnih zločina počinjenih za vrijeme opsade Sarajeva), kao i sudija Mehanizma (pravnog sljednika MKSJ-a) Liu Daqun i glavni registrar Mehanizma Adenuga Adeboye. Druga komponenta se odnosila na centralnu manifestaciju obilježavanja Dan opsade Sarajeva 1992.-1995. za 2020 koja se trebala desiti na trgu ispred Vijećnica, a na kojoj bi se na dostojanstven način obilježila opsada Sarajeva i izvršio pomen na sve žrtve opsade. Istovremeno je bilo planirano da se i sa Modulom memorije MESS-a upriliči i izložba fotografija ratnih fotoreportera iz opkoljenog Sarajeva. Uslijed pandemije koronavirusa i proglašenja stanja nesreće u Federaciji BiH, dana 16.03.2020. događaj je u cijelosti otkazan. Međutim, cijeneći okolnost da ove aktivnosti na obilježavanju ovog Dana u 2020. godini nisu realizovane uslijed pandemije koronavirusa, u pripremi Programa obilježavanja Dana opsade Sarajeva u 2021. godini, zauzet je stav da u Program obilježavanja 2021. godine treba uvrstiti aktivnosti iz Programa 2020. godine, a na šta je Gradsko vijeće dalo svoju saglasnost na sjednici održanoj u oktobru 2020. godine.

U saradnji sa Memorijalnim centrom Potočari-Srebrenica, Grad Sarajevo je putem Informativnog centra i osoblja postavio i uz prigodan umjetnički program predstavio opus „Exodus“ akademskog slikara i grafičara Safeta Zeca koji je bio smješten u Fabrici akumulatora u sklopu Memorijalnog centra i dostupan javnosti u periodu od 07.07.2020. godine do 07.10.2020. godine. Na ovaj način Grad Sarajevo je dao značajan doprinos obilježavanju 25. godišnjice od genocida u Srebrenici.

Informativni centar o MKSJ Sarajevo je u tekućoj godini okončao i tri značajne aktivnosti koje su dodatno ojačale mandat i djelovanje Centra. Tako je u cijelosti opremljena biblioteka Centra uz finansijsku podršku Fondacije Konrad Adenauer – Program Vladavine prava za Jugoistočnu Evropu u vrijednosti od 5.000 EUR-a, te se sada u prostoru biblioteka nalaze sve dopremljene kopije dvojezičnih presuda MKSJ-a i vrijedna bibliotekarska građa Tribunala, te

je dostupna javnosti, stručnoj i akademskoj zajednici za potrebe korištenja ili naučnoistraživačkog rada.

Uz podršku Fondacije Konrad Adenauer – Predstavništvo u BiH Informativni centar je razvio i svoju vlastiti web stranicu (bhs/eng) sa video uradcima: <https://icmksj-sarajevo.ba/>, a koja je zvanično puštena u rad 18.10.2020. godine. Finasijska podrška KAS-a je iznosila 1.500 EUR. Najznačajnija aktivnost Centra u 2020. godine je svakako realizacija Projekta – izrada, postavka i svečano otvaranje stalne izložbene postavke „Prikaz rada i doprinosa Međunarodnog krivičnog suda za bivšu Jugoslaviju (MKSJ)“, a koja je realizovana uz finasijsku podršku Fondacije Konrad Adenauer – Predstavništvo u BiH u visini od 12.000 EUR. Izložba je zvanično otvorena 23.10.2020. godine povodom Dana UN-a, u ceremoniji otvaranja na kojoj su se putem video poruka obratili: predsjednik Mehanizma sudija Carmel Agisu, glavni tužilac Mehanizma Serge Bramertz i g. Fabian Salvioli, Specijalni izvjestilac-UN Human Rights (OHCHR). Na samoj ceremoniji otvaranja postavke u Vijećnici su se obratili i NJ.E. Ingrid Macdonald, UN Rezidentualni koordinator u BiH, direktor KAS-a u BiH g. Sven Petke NJ.E. Ingrid Macdonald, UN Rezidentualni koordinator u BiH. Izložbu su zvanično otvorili putem otkrivanja ploče gradonačelnik g. Abdulah Skaka, predsjedavajući Gradskog vijeća Grada Sarajeva g. Igor Gavrić i direktor KAS-a g. Sven Petke. Ceremoniju otvaranja je uživo prenosila TV SARAJEVO.

Mandat za postavku izložbe

Prema tačkama 1.3. do 1.4. Memoranduma o razumijevanju za razvoj Informativnog centra u Sarajevu potpisanog između Grada Sarajeva i MKSJ (sada Mehanizam/MRMKS, kao pravni sljednik MKSJ-a) iz novembra 2016, mandat Informativnog centra o MKSJ Sarajevo je da pruži javnosti ažuriran, direktan i bezbjedan pristup svim javno dostupnim spisima MKSJ-a i arhivskom materijalu sadržanom u online bazama podataka MKSJ-a, kao i informisanje i edukacija javnosti o pitanjima ratnih zločina, doprinoseći tako procesu tranzicione pravde i jačanja vladavine prava u BIH i regionu uspostavljanjem snažne outreach komponente, uključujući: komponentu tranzicione pravde – doprinos procesima tranzicione pravde i suočavanja s prošlošću organizovanjem raznih informativnih i edukativnih javnih događaja, komponentu podrške pravnim profesionalcima i civilnom društvu – aktivnosti na izgradnji kapaciteta usmjerene ka pravnim stručnjacima i grupama civilnog društva koji se bave ratnim zločinima pred domaćim sudovima u BIH i izložbena komponenta – prikaz rada MKSJ-a i sudova u BIH na donošenju presuda u predmetima ratnih zločina.

Osnovne informacije o razlozima izrade izložbene postavke i njenim ciljevima

Mandat Informativnog centra, također, uključuje izložbenu komponentu pa je tako zaključeno da je važno za posjetitelje, naučnike i javnost općenito da se vizuelno predstavi rad i dostignuća Tribunala.

Prvo, bitno je naglasiti da se u nacrtu izrade projekta, gradska administracija oslanjala na iskustva i prijedloge članova Savjeta gradonačelnika za Informativni centar, da je angažovala idejne projektante, koristila dobre prakse i smjernice za pripremu memorijalnih događaja i

sličnih aktivnosti, a sve kako bi se promovisala izložbena komponenta Centra – predstavljanje rada i doprinosa MKSJ-a.

Promocija izložbene komponente vrlo je koristan i učinkovit alat u ostvarenju ciljeva sveobuhvatnog mandata Centra. Također, vizualizacija sadržaja doprinosi boljem informisanju, obrazovanju i suptilno doprinosi prihvatanju utvrđenih činjenica i u skladu sa tim, suočavanju sa prošlošću. Izložba se može uvijek koristiti i kao platforma oko koje se realizuju druge ideje i sadržaji, npr. različite obrazovne aktivnosti, prezentacije, okrugli stolovi, itd. Također, Sarajevu i BiH nedostaje jedan ovakav jedinstven i sveobuhvatan sadržaj., Konačno, izložba koja prikazuje rad i doprinos MKSJ-a je neophodan sadržaj koji dopunjuje postavku autentične sudnice MKSJ-a koja je dopremljena u sarajevsku Vijećnicu kako bi se sačuvala nasljeđe prvih dostignuća na putu prema međunarodnoj pravdi i krivičnoj odgovornosti još od Drugog svjetskog rata.

Informativni i obrazovni ciljevi izložbe uključuju:

- Objektivno i jasno informisanje o razlozima za uspostavljanje, radu i ukupnim rezultatima MKSJ-a;
- Sticanje boljeg razumijevanja prošlosti na temelju utvrđenih činjenica u presudama MKSJ-a, uključujući borbu protiv negiranja i sprječavanja revizionizma;
- Informisanje o pitanjima ratnih zločina, međunarodnom humanitarnom pravu i tranzicionoj pravdi;
- Stvaranje empatije prema žrtvama i očuvanje njihovog sjećanja;
- Prepoznavanje ratnih zločina kao gubitka za civilizaciju u cjelini, kao i za zemlje koje su bile direktno izložene ratu;
- Povećanje svijesti o opasnosti od mržnje, netrpeljivosti, radikalnih i secesionističkih pokreta i režima;
- Stavljanje u središte pažnje i drugih ratnih zločina, posebno genocid i holokaust;
- Promicanje mira, poštivanje ljudskih prava i vjerovanja u dostupnost međunarodne pravde;
- Širenje kritičkog promišljanja i intelektualne radoznalosti i povećanje osjećaja lične odgovornosti kod demokratskih građana;
- Opći ciljevi projekta su sljedeći: doprinijeti procesima tranzicione pravde i suočavanja sa prošlošću u BiH i regionu (na prostoru bivše Jugoslavije).

Specifični ciljevi projekta su sljedeći: razvoj izložbene komponente – prikaz rada MKSJ-a na putu prema utvrđivanju činjenica o ratnim zločinima počinjenim na području bivše Jugoslavije.

Idejni koncept izložbe

Izložba je konstruisana i postavljena u sarajevskoj Vijećnici – u prizemlju, desno od glavnog ulaza. Izložba će biti postavljena u tri odvojene, ali povezane prostorije i dodatnom holu,

pored originalne sudnice MKSJ-a br. 2 dopremljene iz Haga i zajedno će činiti jedinstveni memorijalni kompleks.

Izložba prikazuje rad i doprinos Tribunala kroz predstavljanje svih 90 pravosnažno osuđenih lica za počinjene zločine razvrstanih po zemljama, a potom i prema regionima i gradovima unutar država u kojima su zločini izvršeni. Predstavljanje svakog pravosnažno okončanog predmeta će sadržavati informacije koje su izvađene iz baze podataka MKSJ-a, bez ikakvih izmjena sadržaja (broj predmeta, optužnica prema tačkama, statistike suđenja, sažetak konačne presude, kao i podatak o državi u kojima se izdržava kazna zatvora). Predstavljanje država, regiona i gradova će pružiti osnovne podatke o geografskom području sa mapama lokacija gdje su izvršeni zločini, kao i statističkim prikazom ljudskih i materijalnih gubitaka uzrokovanim počinjenim ratnim zločinima.

U ulaznom holu izložbenog prostora nalaze se osnovni podaci o Tribunalu, originalni tekst Rezolucije Vijeća sigurnosti UN-a broj 827 kojom je osnovan Tribunal, opis/biće zločina za koje je sudio Tribunal preuzet iz njegovog Statuta. Također, tu su i fotografije sa sjednice Vijeća sigurnosti UN-a na kojoj je osnovan Tribunal, sa prvog suđenja, ceremonije zatvaranja MKSJ-a, prostora za publiku unutar MKSJ-a za vrijeme suđenja, kao i prikaz vanjskog i unutrašnjeg izgleda zgrade u kojoj je bilo sjedište Tribunala u Hagu, uključujući i fotografije pritvorske jedinice Tribunala, fizičkog arhiva suda i samih sudnica za vrijeme trajanja suđenja.

Drugi segment izložbene postavke je prikaz autentične sudnice broj 2. Tribunala u kojoj se sudilo licima optuženim za ratne zločine na području bivše Jugoslavije i koja je dopremljena direktno iz Haga nakon zatvaranja MKSJ-a. Ovim je Sarajevo postalo prvi grad nakon Nürnberga koji ima originalnu sudnicu jednog međunarodnog suda gdje su se održavala suđenja za ratne zločine.

U prostoriji sudnice mogu se vidjeti originalni mobilijar, pijedestal za sudije, zastor i zastava UN-a koja se nalazila u sudnici broj 2. u Hagu. Na autentičnim stolicama i stolovima u frontalnom dijelu prostora sjedili su članovi sudskih vijeća MKSJ-a, te stručno osoblje suda u redu ispod. Sa desne strane od sudskog vijeća sjedili su advokati odbrane optuženih i sami optuženi su sjedili u drugom redu. Lijeva strana od sudskog vijeća bila je namijenjena za sjedenje tužioca i njegovih saradnika. Svjedoci su sjedili na klupi preko puta sudskog vijeća i prije svjedočenja polagali su zakletvu čitanjem teksta koji se nalazi na samom stolu. Crnu sudsku odoru nosili su advokati odbrane, tužioci i stručno osoblje Suda, dok je crvena odora bila namijenjena isključivo za sudije. Izložena crvena odora je pripadala sudiji Faustu Pocar u koji je bio sudija Tribunala od februara 2001 godine, dok je u periodu od 2003. do 2005. godine obavljao i funkciju potpredsjednika suda, a u periodu od 2005. do 2008. godine bio je i njegov predsjednik. Sudija Pocar je za potrebe otvaranja Centra kao vid snažne podrške njegovom osnivanju i radu lično poklonio svoju sudačku togu u kojoj je sudio punih 17 godina. Na zidovima unutar prostora sudnice se nalazi vremenska linija koja prikazuje najznačajnije datume u radu Tribunala od njegovog osnivanja 25.05.1993. godine pa sve do zatvaranja 31.12.2017. godine, kao i prikaz organizacije MKSJ-a i krivičnog postupka pred

Tribunalom. Dio prostorije posvećen je i fotografijama sa imenima predsjednika Tribunala i njegovim glavnim tužiocima.

Centralni dio izložbene postavke Centra je posvećen predstavljanju rada i doprinosa MKSJ-a kroz prikaz infografika za sva osuđena lica pred Tribunalom, a koji su razvrstani prema državama, regionima i gradovima unutar država gdje su počinili ratne zločine za koje su pravosnažno osuđeni. Najveći broj pravosnažnih osuđujućih presuda izrečen je za ratne zločine počinjene na području Bosne i Hercegovine.

Svaka infografika se sastoji od informacija o predmetu protiv svakog osuđenog lica i preuzeta je iz baze podataka MKSJ-a bez ikakvih modifikacija sadržaja, a što uključuje autentičan broj predmeta, tačke optužnice, presuda, kazna, statistika suđenja i podatak o zemlji u koju je osuđeno lice upućeno na izdržavanje kazne zatvora).

Prateće fotografije, izvodi iz svjedočenja, izjave, kao i ostali izložbeni sadržaj u prostoru je preuzet iz baze MKSJ-a i kao takav je korišten kao dokazni materijal u postupcima koji su vođeni pred Tribunalom.

U konačnici, jedan dio izložbene komponente sadrži popis dostignuća Tribunala (Utvrđivanje činjenica, Pravda za žrtve, Pozivanje vođa na odgovornost, Individualizacija krivice, Prilika da se čuje glas žrtava, Jačanje vladavine prava).

Obzirom na epidemiološku situaciju izazvanu pandemijom koronavirusa, Centar je zabilježio značaj pad posjeta od strane turista i studenata. Održano je samo u mjesecu augustu 2020. godine predavanje za 25 studenata Međunarodne ljetne škole u organizaciju Pravnog fakulteta Univerziteta u Sarajevu, Udruženja „Pravnik“ i Fondacije Konrad Adenauer – Program Vladavine prava za Jugoistočnu Evropu. Centar je u mjesecu julu 2020. godine posjetio i g. Bakir Izetbegović, dopredsjedavajući Doma naroda Parlamentarne skupštine BiH i predsjednik Stranke demokratske akcije BiH. Od značaja je svakako istaknuti i da je Savjet gradonačelnika za Informativni centar o MKSJ Sarajevo dobio još jednog uvaženog člana, g. Amora Maševića.